

Keuntungan Malaysia Smelting Corp melonjak lapan kali ganda



Malaysia Smelting Corporation Berhad

(43072-A)



18/02/2022 09:06 PM

KUALA LUMPUR, 18 Feb -- Keuntungan bersih Malaysia Smelting Corporation Bhd (MSC) melonjak hampir lapan kali ganda sehingga mencecah rekod tertinggi sebanyak RM118.06 juta pada tahun kewangan berakhir 31 Dis 2021 daripada RM15.16 juta yang dicatatkan semasa tahun kewangan 2020 disebabkan oleh harga timah yang lebih tinggi.

Pendapatan meningkat 32 peratus kepada RM1.08 bilion daripada RM813.36 juta sebelumnya.

Syarikat pelombong timah dan pengeluar logam itu dalam maklumannya kepada Bursa Malaysia menjelaskan pendapatan telah dilonjakkan oleh kenaikan harga timah dengan purata RM130,575 setiap metrik tan (MT) tahun lepas berbanding dengan RM71,559 setiap MT pada 2020.

Bahagian perlombongan timah adalah pamacu pendapatan utama dengan keuntungan bersih menokok lebih daripada lima kali kepada RM109.4 juta pada tahun kewangan 2021 daripada RM20.6 juta pada tahun sebelum ini.

"Pertumbuhan itu disokong oleh harga timah yang agak tinggi termasuk peningkatan pengeluaran timah pada tahun berkenaan," kata MSC.

Sementara itu, bahagian peleburan timah melaporkan pengeluaran logam yang lebih rendah pada tahun kewangan 2021 susulan gangguan operasi akibat Perintah Kawalan Pergerakan Penuh 3.0 yang dikuatkuasakan mulai 1 Jun 2021 dengan "force majeure" berikutnya dari 7 Jun 2021 sehingga 20 Dis 2021 .

("Force Majeure" adalah istilah bahasa Perancis yang merujuk kepada peristiwa yang tidak dijangka yang menghalang pemenuhan kontrak.)

"Ini diimbangi dengan pembalikan inventori yang diturunkan berjumlah RM24.0 juta pada suku pertama tahun kewangan 2021 dan margin yang lebih tinggi daripada penjualan timah halus yang diperolehi daripada perantaraan timahnya.

"Hasilnya, bahagian peleburan timah melaporkan keuntungan bersih tahun kewangan 2021 sebanyak RM12.1 juta berbanding RM3.2 juta yang direkodkan pada tahun sebelumnya," kata MSC dalam satu kenyataan media.

Ketua Pegawai Eksekutif Kumpulan Datuk Dr Patrick Yong ketika mengulas mengenai unjuran berkata defisit bekalan timah dijangka akan berterusan, ini akan mengekalkan harga timah dalam jangka pendek hingga sederhana.

"Pada masa yang sama, permintaan timah tetap teguh sejajar dengan pertumbuhan global dalam kenderaan elektrik, pemasangan fotovoltan dan elektronik pengguna serta lain-lain lagi," katanya.

-- BERNAMA